

## 2 SAN JUAN

### Juan gāme maírímarē gojadea

<sup>1</sup>Yu bugoro, murē Marīpu beyedeore mū pūrādere i pūrē gojáa. Yu musārē diayeta maīa. Yu dita musārē maībea. Āārīpererā musā puro āārírā Jesúya diayema āāríríre masírā musārē maīma.

<sup>2</sup>Marī ĩgūya diayema āāríríre marīya yujupūrāriigue masīa. ĩgū neō piriro marírō marī merā āārínísā, marírē irire masímakū yámi. Irasírírā gua musārē maīa. <sup>3</sup>Marīpu āārínígū, ĩgū magū Jesucristo marī Opū merā musārē oārō iritamu, bopōnarī merā ĩā, síñajārī merā āāríríkumakū iriburo. Irire irigu, diayema āārírí, maírī merā irasiriburo.

<sup>4</sup>Surāyeri mū pūrā Marīpu marírē dorederosūta Jesúyare irirā āāríma, āírírī kerere pégu, buro usuyabu.

<sup>5</sup>Dapagora murē ire gojagura. Marī gāme maírō gāamea. I yū gojarī, maama doreri āāríbea. I doreri, marī Jesúre buremunugādeapoegue masídeata āārā. <sup>6</sup>Marī gāme maírā, Marīpu dorederosūta yāa. I doreri, musā Jesúre buremunugādeapoegue pédeata āārā. Āsū ārā. Gajírārē maíníkōāka!

### Wārā ārīkatorikurā āāríma, ārī gojadea

<sup>7</sup>I ũmūguere wārā ārīkatorikurā waagorenama. “Jesucristo marī irirosū dupukugu i ũmūguere aaridi āārímí’,

āírírī, diaye āāríbea”, ārīma. ĩgūsāta ārīkatorikurā, Cristore ĩaturírā āāríma.

<sup>8</sup>Irasírírā oārō pémasíka musā! ĩgūsā ārīkatorire buremubirikōāka! ĩgūsā ārīkatorire buremurā, musā Marīpuyare iridea waja ĩgū musārē wajariburire dedeubukoa. ĩgūsā ārīkatorire buremubirimakū, musā ĩgūyare iridea waja musārē wajariburire sípeogukumi.

<sup>9</sup>Sugū Cristo buedeare béo, ĩgū gāāmerō gajire bueguno, Marīpu merā oārō āāríbemi. Cristo buedeare buremugū ĩgūyare irituyagu gapū Marīpu merā oārō āārími. Irasū āārímakū, ĩgū magū Cristo merā oārō āārími. <sup>10</sup>Irasírírā, sugū Cristo buedeare buebi, gajī buerire bueguno musā puro ejamakū, ĩgūrē bokatírísērē, musāya wiigue ñajādorebirikōāka! <sup>11</sup>Musā ĩgūrē bokatíríñeārā, ĩgūrē iritamubukoa. Irasírírā ĩgūrē iritamurā ĩgū irirosū ñerō irirā āāríbukoa.

### Juan gojatūnudea

<sup>12</sup>Yu gajī wārī musārē wereduakeregu, i pūguere gojabiríkōa. Yu basita musā pūrogu musā merā werenígū waagukōa. Marī basi weretamurā, oārō usuyarī merā āārírākoā.

<sup>13</sup>Mū pagūmo pūrā murē oādorema. Igode Marīpu beyedeota āārímo. Iropata āārā.  
Juan